

O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839 O LE SULU SAMOA IULAI 2021

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

ALOA'IA LE FAIGA MALO LONA XVII O SAMOA



VAEGA FAA-UPUFAI, O LE FAATUATUA I LE ATUA SAMOA UA TASI

FAASINO UPU

1.O LE LAUGA	2
2.ALOA'IA FAIGAMALO LONA XVII	4
3.FEILOA'I LFT, KMTA & AO LE MALO	5
4.PALEMIA & KAPENETA SUI EFKS	5
5.LAUGA FAAULUFALEGA PAPAUTA	6
6.VAELUA MATAGALUEGA APIA SASA'E	7
7.TATOU MEA'AI TATAU MA LE ASO	8
8.MO LE FAAMOEMOE O LE TALALELEI 10	
9.O EUA FAI I LAGI FOLAUGA	12

O LE LAUGA

Tusi Faitau : Kenese 13: 1 - 18

Matua: f8-9 “*Ona fai atu lea o Aperamo ia Lota, ‘Aua lava ne’i femisa’i i ta’ua, po o a ta’ua leoleo manu; auā o le uso i ta’ua. ’E lē o i ou luma ea le laueelele uma? Se’i e te’ a ese ma a’u. Afai e te alu i le itu tauagavale, ona ou alu lea i le itu taumatau; a ē alu i le itu taumatau, ona ou alu ai lea i le itu tauagavale.*”

Manatu Autu: **O le filifiliga sa’oloto.**
The freedom of choice.”

O aiā tatau fa’ale-tagata po’o Human Rights, o le saolotoga a lea i so’o se tagata e soifua ma ola ai (Right to life); le sa’olotoga e filifili ai i le olaga e lē saisaitia ma pologa, ae sa’oloto ai (Right to liberty and freedom), le sa’olotoga e filifili ai i le mea e ola fiafia ai (the Right to the pursuit of happiness), le sa’olotoga e tautala ma fa’ali ai manatu(Freedom of opinion and expression), le saolotoga e tapua’i sa’oloto ai i lau lava tapuaiga (freedom of Religion) atoa ai ma le isi anoanoa’i o aiā tatau, ua fa’ata’atitia e le Fa’alapotopotoga o Malo Aufa’atasi mo so’o se tagata ma so’o se atunu’u Temokarasi.

O le ata moni lava o nei mea, o le faiga filifiliga sa feagai nei ma si o tatou atunu’u, i lana faiga palota. Palota ai le tagata, i lana aiā tatau, i lē ua na talitonuina e agava’ a ma talafeagai e fai ma sui o itumalo ta’itasi, e fa’aleoina o latou lagona ma mana’o, i mea e agatonu mo le soifua lelei o tagatanu’u o Samoa. Ae maise o le tagata ua latou talitonuina e amiontonu ma moni le alofa e fa’amuamua ai Samoa, ma talitonu i le mana o le Atua latou te pola-fa’asoai manua

mo tagata uma. O le fa’amoemoe maualuga lea o aiā tatau, ina ia i le tagata le sa’olotoga e filifili ai i le mea na te talitonu e lelei ma manua ai lona aiga, lona nu’u, lona atunu’u ae maise o lana Ekalesia. Auā o le tagata ma lana lava filifiliga, e fiafia ma manua ai; o lana filifiliga fo’i, e leaga, e fa’anoanoa, e pologa ma ta’uvalea ai.

E fa’apea se ata lea tatou te iloa i le fefa’asoai’iga a Aperamo ma Lota. O Aperamo ua faatamao’ aigaina i auro ma ario ma lafu manu, o Lota fo’i sa ia te ia mamoe ma povia tele ma fale’ie. O le latou toe fo’i atu i Peteli mai Aikupito, o le fanua fai mai na mua’i to ai le fale’ie o Aperamo ma na fa’atu ai le fata fiaitaulaga e osi ai ana taulaga i le va o Peteli ma Ai. O i’ina na iloa ai le fa’alētonu, ina ua femisa’i a la’ua tagata faigaluega, ona ua lē lava mea e tausi ai a latou lafu, o lona uiga ua ‘uti’uti le avanoa mo i latou, auā o lo’o aumau ai foi ma tagata o sa Kananā ma sa Perisē.

O i’ina na manatu ai Aperamo, ua tatau ona fai se fofō o le fa’afitaui ua tula’i mai, ona e lē tatau ona taua’i misa lona aiga. O le tōfā fa’ata’ita’i mataāla, e na ona ia iloa lava o le fe’ese’esea’iga ua tula’i mai, mafaufau loa i se auala lelei e fō’ia ai. O le tamā e alofa ma pele ia te ia lona aiga, e lē mana’o e vaeluaina, ona o nei mea fa’atauva’ a. E naunau i le nofo lelei ma le fealofani o ona tagata. E moni le alofa. E le’i manatu fa’apito foi ia te ia lava ua matua ma toeaina, peita’i na ia ave le fa’amuamua ia Lota e filifili ai ma tusi lona lima i le mea e fia nofo ai. Atonu foi i lona manatu, ua tele ma ua lava ma totoe tamaoaiga ma faamanuiaga ua ia te ia, a e tu’u le avanoa ia Lota e atia’ e atili ai. O le agaga fa’akerisiano e fa’amuamua ai ma fa’asili isi, nai lo ia. E ui o eleele nei, o fa’amanuiaga ua uma ona folafolaina e le Atua mo ia ma lana fanau, peita’i sa maualuga ia Aperamo le alofa i ona tagata ina ia ola manua foi latou.

O lana tala ia Lota le atali’i o lona uso, “*Ia ‘aua lava ne’i femisa’i ta’ua, po’o a ta’ua leoleo mamoe...E lē o i ou luma ea le laueelele uma? Se’i e tea ese ma a’u. Afai e te alu i le itu tauagavale ona ou alu lea i le itu taumatau; a e alu i le itu taumatau, ona ou alu lea i le itu tauagavale.*”

O lea ua na tu’u le sa’olotoga ia Lota le atali’i o lona uso e filifili ai i le mea e mana’o e nofo ai. Fai mai le tala, ua va’ava’ai Lota ona ia iloa atu ai lea o le fanua laugatas, ua i ai Ioritana, ua lafulēmū uma lava

e o'o i Soara, e pei o le fa'atoaga a le Ali'i, e pei o le laueelele o Aikupito, a o le'i fa'aumatia e le Ali'i o Sotoma ma Komoro. Ona filifili ai lea e Lota mona o le fanua laugatasi uma ua i ai Ioritana, ma ua ia aga'i foi i sasa'e, ona la te'a eseese ai lea o le tasi ma le tasi. Ua fa'atū foi e Lota lona fale'ie i le fanua laugatasi ua o'o atu i Sotoma. Ae fai mai le tala, o tagata o Sotoma ua leaga, ma ua matuā agasala lava i luma o le Ali'i. O faigatā sa le'i mafaufauna e Lota auā o le filifili sa na fai ma le manatu fa'apito. Ina ua fa'ananau lona loto, ma ua fia nofo i mea lelei. E le'i iloa ni fa'amanuiaga, na fa'amanuiaina ai Lota, ae fai mai le tala, e anoanoa'i faigatā na fetaia'i ma ia ona o tagata o Sotoma, auā o tagata agasala ma ola fa'apaupau. A'o iinei lea ua iloa ai le ituaiga tagata e i ai Lota, o le tagata e lē mamaafa ia te ia le va nonofo ai ma ona ta'ita'i, po'o tagata matutua o lona aiga, e tatau i ai le fa'aaloalo. Auā, e ui na tu'u ane e Aperamo le avanoa na te filifili muamua ai, ae sa tatau lava ona ia lafo ma tu'u pea le fa'amuamua i le uso o lona tamā. O nei ona po, ua anoanoa'i tagata fa'apei o Lota, ua lē manatu i ē matutua o nu'u ma aiga ma le Ekalesia, ae ua manatu ia i latou lava, tagata ua lē i ai se agaga alofa. Ua o'o foi i le aufaigaluega faifeau, ae maise nisi o i latou e talavou le ola, talavou foi i le galuega, ua lē iloa le vā nonofo ai ma Tamā o le Ekalesia ma ē na mua i malae. Ua lē usita'i ma lē fa'alogo ona ua manatu o i latou ua popoto, ua i'u mai ma fa'ailogfa'anei ona po. Ua masausau le atamai ma ua lē iloa ai le va fealoa'i ma le ola fa'aaloalo. Ua o'o lava fo'i i A'oa'o Fesoasoani ma Tiakono, o nisi ua manatu o i latou e pule i aulotu ma Ekalesia. Ua manatu fa'amaualuluga, ma ua maua i le ola fiasili. O le fautuaga a Paulo ia Timoteo lona atali'i fa'aleagaga, o le fa'amanatu foi mo tatou, "A o oe le tagata o le Atua, ia e sola ese i ia mea, a ia e tausisi atu i le amiontu ma le amio Atua, ma le fa'atuatua ma le alofa ma le onosa'i ma le agamalū."

Ma o ata lava fo'i nei o le tele o a tatou filifili fai, ua filifili lava i le vaai o tatou mata, ma le mana'o lasi o le loto. O mea e foliga e lelei, ma lafulēmū ma matagofie mai, a o mea fa'apena lea ua tele a ina pa'uū ma faiaina ai i le olaga nei, ma i'u ai i le matagā ma fa'alumaina ai nai matua ma aiga, nu'u ma le atunu'u. Ae sili ona upuia ma ta'uleagaina ai le Ekalesia pele a le Atua. Aisea? Ona ua leai se ola mafaufa lelei. Ua leai se ola tatalo ma mafuta i le Atua, le Tamā e 'oa i mafaufa lelei e tapasā ai le

ola, o Lana aufaigaluega. O Aperamo, na fai ana fa'aiuga ma ana filifili i lona fa'atuatua i le Atua, o Le na tu'uina mai ia te ia le loto matala ma le to'afilemu, e na te fai ai fa'ai'uga faigatā. Fa'ai'uga fo'i na fai ma fa'avae i le alofa fa'a-tamā. Lea lava na ia fa'asili ma fa'amuamua ai Lota, e ui e tupulaga ma lana fanau. Ae fai mai ina ua uma ona ia tu'u atu Lota e alu i le mea na ia filifili e nofo ai, e le'i pine lava, ae fetalai ane le Atua ia te ia, "Se'i e va'ava'ai ia ma e iloa atu i le mea e te i ai na, i le itu i matu, ma le itu i toga, ma sasa'e ma sisifo; auā o le eleele ua e iloa atu nei, ou te foaina atu mo oe ma lau fanau e fa'avavau. Ou te faia foi lau fanau e pei o le efuefu o le eleele, afai e mafai e se tagata ona faitauina o le efuefu o le eleele, ona mafai lea ona faitaulia o lau lava fanau". E le'i popole Aperamo po o le ā le telē o le fanua e mana'o i ai Lota e fai mo ia. O le mea na tāua ia te ia, o le nofo lelei, ma le ola fealofani o lona aiga ma le fanau pele a le Atua. Auā o le finagalo lea o le Atua mo ia, e lē gata ina fai ma tupuga o le nu'u tele, a ia avea foi o ia, ma fa'amanuiaga mo lona aiga ma ona tagata uma, ma ia 'aua ne'i pologa se tasi ona o ia. Sa ia te ia le alofa fa'ale-Atua, lea fo'i ua fa'amanuiaina ai lava o ia ma lona aiga e le Atua. Ae o le tatalo lea, ina ia fa'apea i latou ua tula'i mai e ta'ita'i Samoa i ana upufai, ae maise fo'i o Tamā o le Ekalesia, ma le aufaigaluega totofi ina ia filifili ma ta'ita'i ma le alofa, i mea e manuia ai le fanau a le Atua. Auā e āfua mai mauga manuia o nu'u, aiga, o le malo ma le Ekalesia.

Atatou filifili ma ta'ita'i fa'atasi ma le Atua, e tatala fo'i ma fa'alautele e le Atua le tatou vaai i mea lelei e manuia ai Lana fanau. Fa'apei ona ia fetalai ia Aperamo, "Ina tula'i ia ma ia fealualua'i le nu'u i lona umi ma lona lautele; auā ou te foaiina atu mo oe." O manuia e le'i mafaufauna e le toeaina, ae o uiga matagofie ia o lo tatou Matai i le lagi, e na te fa'asili mea mo le tagata e fa'amuamua ma fa'asili isi, ae maise o Ia. E fa'apena foi ona ia faia mo i tatou, pe afai tatou te faapea lava ona fai.

Alofagia e le Atua Samoa ma lau faiga-malo, le Palemia ma le Kapaneta ma outou ua tula'i mai ma tusi aao i ai le atunu'u, ina ia filifili ma le tonu i mea lelei, ia ta'ita'i ma le alofa auā se manuia o le atunu'u. E lē taulia po o ai, ae taulia ni ta'ita'i e onosa'i, e fa'amaoni, e amiontu ma alolofa moni ia Samoa. E fa'atuatua foi i le Atua. Ia ave'ese le manatu fa'apito ia te outou lava, ina ne'i taunu'u ia te outou le tatou muāgagana 'Ua maua 'ula futifuti'. 'Ua ai ulu, tuana'i

ta'isi.' O le tāua ia o a tatou faiga filifiliga a o tatou i ai i le savaliga ma le faigamalaga i le olaga nei. O le filifiliga saoloto, ae ia fai ma le poto, ia iloa ona fa'aaloalo, ae maise o le alofa. E fa'amuamua ma amana'ia ai tagata e tatau i ai le fa'amuamua. Ae sili ai ona fa'amuamua le Atua, i mea uma tatou te manana'o ai. Auā o i'ina e iloa ai le tagata atamai, e iloa fa'avasega tuaoi tāua o le ola. Ona fa'amaniuaina ai lea e le Atua, o mea uma o le a outou taumafai i ai mo Samoa. O la Mika le perofeta a le Atua, "Sole, ua fa'aali atu e Ia ia te oe le mea lelei; se a fo'i se mea e finagalo ai le Alii ia te oe, pe a le o ia mea, ia fai le amiontonu, ia naunau i le alofa, ma ia feoa'i ma lou Atua ma le loto fa'amaulalo."

Ia alofagia foi e le Atua lau folauga i lenei tausaga le Ekalesia pele, ma ia tatou filifili pea le Atua e ta'ita'i e pei ona Ia alofa ma tausi mai o tatou tagata agasala. Ina ne'i se'etia le tatou vaai ma fa'asesēina le tatou fa'alogo ma mana'o ai i mea fa'atosina o le olaga nei, ma faatāua ai tupe, o le 'oa ma le tamaoaiga, ae afaina ai le ola talitonu ma fa'atuatua o Lana fanau tautua. Fai fai mālū ou faiva. Auā o le finagalo lava ia o le Atua, na Ia fa'asavavali mai ai Isaraelu lona nu'u i le vao i le fasesfulu tausaga. Ina ia a'oa'oina ai, ma iloa ai ona ola fia aai ma fia feinu, ae fa'atupuina ai lo latou loto talitonu ma fa'atuatua ia te Ia ma Lona alofa tunoa.

Ia manuia lau folauga ma le aga'i atu i feau fa'ai'u o lenei tausaga. O la Aperaamo ia Lota, "Aua lava ne'i femisa'i i ta'ua, po o a ta'ua leoleo mamoe; auā o le uso i ta'ua." A o le finagalo foi lea o Iesu, mo Lona au so'o, "Ia outou fealofani." Mulia'i, o le tu'ualalo a Paulo i le Ekalesia i Korimoto, na ia fa'apea atu ai, "O lenei, o savali i matou a Keriso, peiseai ua aioi mai le Atua ia te outou e ala ia i matou; matou te ole atu, o sui i matou o Keriso, ia outou lelei ma le Atua. Auā o lē na lē iloa le agasala, na faia o ia e le Atua ma agasala, mo i tatou; ina ia avea i tatou ma amiontonu a le Atua ia te Ia."

O outou māmā na.

Matou te alolofa tele atu mo outou.

Soifua ona o Iesu. Amene.

Saunia Susuga Osa Nanai FS,
EFKS Caboolture,
MATAGALUEGA KUINISELANI.

ALOA'IA FAIGAMALO LONA XVII

O se vaitau tulaga ese lenei i le tala faasolopito o le atunuū, i ona upufai o malo. O le mataupu sa laualuga i talosaga molia a le Ekalesia i ana tapuaiga, ma lana galuega taulogologo o le Tala Lelei i le Upu folafola, e faala'e'i'au, faamafanafana ma faato'a filemu ai ona tagata faatuatua, ae maise foi ina ia soifua ma faatino tofi ma tiute e tusa ma le finagalo o le Atua. O se mataupu foi na aafia ai le faasologa o galuega a le Ekalesia e pei o lana Fono Tele o lenei tausaga. O le Aso Faraile 23 Iulai 2021, na faia ai le faai'uga a le Faamasinoga Apili a Samoa (o le Faamasinoga aupito maualuga lea), e faamaonia ma aloa'ia ai le filifilia o le vaega faaupufai o le Faatuatua i le Atua Samoa ua Tasi (FAST), e ta'ita'iina le Faiga Malo a Samoa mo le isi lima tausaga. O le aso 9 Aperila 2021, le faiga palota mo sui faipule o itumalo e 51. O le i'uga o le palota, e ta'i 25 sui o vaega faaupufai o le FAST ma le HRPP, ma le sui tutoatasi, lea na ia filifili e faatasi atu i le FAST ma atoa ai le 26 o latou sui. Ae le'i fa'asilasila aloaia mai ai lea filifiliga, ae aumai le malelega a le Ao o le Malo i le po, e tofia ai le isi sui tamaitai faaopoopo, e fa'aatoa ai sui tamaitai o le Palemene. O lea sui tamaitai o le sui o le HRPP, ma sa faitauina ai ua 26 foi sui faipule o lea vaega faaupufai, e tutusa ai sui faipule o vaega e lua, ma lē maua ai se vaega faaupufai e taitaiina le malo.

Na amata mai ai i lea taimi le faasologa o faamasinoga ma apili, i le taumafaiga a vaega faaupufai e lua, e saili le sa'o ma le tonu, e ala i le faamasinoga amiontonu a le Ofisa o Faamasinoga. E tusa ma le faavae o le malo Samoa, e tatau ona fono le Palemene i totonu o le 45 aso talu ona mae'a le faiga palota. O le aso 24 Me 2021 e atoa i ai lea periota, ma sa faataunuū e le FAST lea faamoemoe i totonu o fale'ie i Mulinuu, ona ua le mafai ona tatala le Fale Fono. O le ulua'i fonotaga foi lea na faatauto ai le Palemia fou, afioga Hon. Fiame Naomi Mataafa, o le Fofoga Fetalai, Susuga Papalii Li'o Ta'eu Masipau ma sui o le Kapeneta. O le susuga Iosefa Atapana Uilelea FT, le Taitaifono Fono Tele sa ta'ita'iina lea sauniga mamalu. Sa le'i auai le Ao o le Malo, le Loia Sili, ma le vaega faaupufai o le HRPP, e le'i faatautoina. Sa latou tuuina atu i le Faamasinoga lenei mataupu, ina ia faalēaogāina lenei faatautoga. Peita'i ane la, o le aso 23 Iulai, lea na faamaonia ai ma faamautu ai loa le faigamalo fou a le FAST. Ua faato'a sui ai lea o le taitaiga o le malo Samoa e le HRPP, talu mai le tausaga 1982. Ia faamanuia le Atua, ma viia o Ia i le faigamalo fou.

FEILOA'I LAULAU FONO TELE, LAULAU KAT & KMTA MA LE AO O LE MALO SAMOA.

O le Aso Lulu 14 Iulai 2021 na masi'i atu ai le mamalu o le Laulau a le Fono Tele faapea le Laulau a le Komiti Au Toeaina faatasi ma Tamā o le Ekalesia o le Komiti Mataupu Tau le Aufaigaluega, i lana afioga le Ao o le Malo Samoa, Tuimalealiifano Vaaleto'a Sualauvi II, i lona ofisa i Vailele. O le faamoemoe o lenei savali, o le tuuina atu o se faamafanafanaga e ala i le tuualalo, se fautuaga ma le talosaga a le EFKS, i le Ao o le Malo, ina ia alofagia e lana afioga, le gasegase o le atunu i ana faigamalo, ia vave maua se i'uga lelei ma filemu, mo le manuia o le atunu. E pei ona silafia, o Tuimalealiifano Vaaleto'a o se itutino o le EFKS - o le A'oa'o Fesoasoani o le EFKS Matautu Falelatai, sa avea foi ma Tiakono Toeaina o le Matagaluega Aana. Peita'i e lē o le faiā autū lea na faapogai, a e o le tofa lava na a'e faama'ite i Tamā o le Ekalesia, e tusa ma le musumusuga a le Agaga Paia, ina ia fai se sao ma se galuega alofa a le EFKS, i le sailiga togafiti mo le gasegase o malo i ona upufai.

E tusa ma iloiloga lata mai o le Faavae o Samoa, o le Ao o le Malo e filifilia e le Kapaneta (sa filifili e le Palemene) e tusa ma le fautuaga a le Palemia. Na tofia ai le afioga Tuimalealiifano i lana ulua'i paeaiga 5 tausaga, i le aso 21 Iulai 2017. O ona tiute e tusa ma le faavae, e aofia ai le faamaonia o soo se tulafono o le malo. O ia e faatautoina sui o le Palemene, ma o lana malelega e tuuina mai ai poloaiga e ao ona tausia ma usita'i i ai tagatanuu uma. A o faagasolo mai taualumaga o le sailiga o se faigamalo a le atunu, sa maitauina ai le tele o malelega a le Ao o le Malo, e faia i taimi o le po, a o sauni malologa a le atunu. O nisi malelega, e toe faaleaogaina ai ana malelega na faia muamua. O tulaga ia na faateleina ai le fememea'i ma faaletonu o le mamalu o le atunu, a o faatalitali se faai'uga mautū, ae ua silia ma le tolu masina talu ona mae'a le faiga palota. O le ala foi lea o le faatofalaiga a le Laulau a le Fono Tele ma Tama o le Ekalesia, ina latou fesilafa'i ma soalaupule, mo se manuia ma se filemu o le atunu. O le susuga Failautusi Aoao sa fai ma fofoga o le sāvali, ma o le molimau e faapea sa tali le Ao o le Malo, o ia na te lagolagoina le faiga malo tausi o i ai i lea lava taimi.

Talosia le alofa o le Atua pule i malo, ia fai ni āi o lenei sao o le EFKS. Faafetai, malo le saili malo.

O LE KAPENETA, MA SUI EFKS

E ui lava ina sa fesouaina le folauga a le atunu i ona upufai, ae o lea lava ua mautū le faiga malo, e pei ona aloa'ia ai le manumalo o le vaega faaupufai o le Faatuatua i le Atua Samoa ua Tasi. O le vaega faaupufai lenei, sa folafola mai i la latou Anavatau, le soloiesea o Lafoga a Faifeau, sa faatulafonoina e le faigamalo talu ai a le HRPP. Sa tagofia e le Fono Tele 2017 le mataupu nei, ma faamauina le tete'e malosi i lenei tulafono, sa molia ai susuga i Toeaina ma le Aufaigaluega Faifeau o le EFKS, o Faafeagaiga Taulagi a nuu ma afioaga. Sa iloga le faatasina i le ala, ona o faamasinoga. E i ai le talitonuga o le tasi lenei mataupu ogaoga, na auala mai ai le toilalo o le vaega faaupufai a le HRPP, ina ua latou faufau e faae'e le avega i luga o le au faigaluega paia a le Atua, o se mea e lē tusa ma Lona finagalo.

O le Fofoga Fetalai tofia, o le susuga **Hon. Papalii Li'o Oloipola Ta'eu Masipau** (Aoao Fesoasoani, EFKS Sapapalii), o le Sui Fofoga Fetalai, o **Hon. Auapaau Mulipola Aloitafua** (Tiakono EFKS Salua-tai & EFKS Vaitele-uta).

O le Palemia ma lana Kapaneta 2021 - 2026:

1. Hon. Fiame Naomi Mataafa - Palemia

(Tiakono EFKS Lotofaga, Komiti Tupe LLA)

2. Hon. Tuala Tevaga Iosefo Ponifasio-Sui

Palemia & Minisita o Tupe Maua (Tiute ma Lafoga).

3. Hon. Laauli Leuatea Polataivao Fosi

(A'oa'o Fesoasoani, EFKS Alamagoto & EFKS Fagae'e)-Minisita Faatoaga & Faigafaiva. **4. Hon. Olo Fiti Afoa Vaai** - Minisita o Galuega. **5. Hon. Leatinuu Wayne Sooialo** (Aoao Fesoasoani, EFKS Vaigaga) Minisita Pisini, Alamanua & Leipa.

6. Hon. Valasi Luapitofanua Toomaga Tafito Selesele

- Minisita Soifua Maloloina. **7. Hon. Faualo Harry Jefferey Schuster** - Minisita Leoleo & Falepuipui. **8. Hon. Mulipola Anarosa Ale Molio'o**-Minisita o Tupe. **9. Hon. Seu'ula Ioane** - Minisita A'oga, Taalogia ma Aganuu.

10. Hon. Toelupe Poumulinuku Onesemo

(Tiakono, EFKS Poutasi) - Minisita o Fesootaiga ma Faasalalauga Faatekonolosi. **11. Hon. Leota Laki Lamositele** - Minisita o Tina ma Tamaitai ma Aga Fesootai. (Minisita Lagolago-**Seuamuli Fasi Toma AF**, Tiakono Toeaina Itu o Tane, A'oa'o Fesoasoani EFKS Fagamalo). **12. Hon. Matamua Seumanu Vasati Sili Pulufana** - Minisita Faamasinoga.

Ia manuia le tula'i mai o le faiga malo fou o Samoa!

LAUGA FAAULUFALEGA MALUMALU KOLISI PAPAUTA.

Tusi Faitau: Iopu 28: 12 – 28

Matua: f.28e, “Faauta, o le mata’u i le Atua, o le poto lava lea; o le ‘alo ese i le amio leaga, o le mafaufau lea.”

Manatu Autu: MEAALOFA TAUGATĀ, AE UA MAUA FUΑ.

Manatu o le Vaiaso: FAAMAFANAFANAGA LĒ AOGĀ.

E le’i ‘ela le mātau ma le faalogo a Iopu i upu ma manatu o ana uo ia te ia. O le taofi o Iopu, o ia upu ma manatu, ua o ni faamafanafanaga lē aogā ma le valea. Fai mai, o ma’i ma tiga ua oo ia te ia, o lona faasalaga lea mai le Atua ona o ana agasala. O loo tuufesili pe a mafaufau o Iopu ma fia malamalamā, i le UIGA MONI O NEI PUAPUAGĀ, a o ia o le tagata amiotonu, mata’u i le Atua, ma ‘alo’alo ‘ese i mea leaga uma. Afai la e sa’o ana uo o lona faasalaga lea mai le Atua, o le fesili – Se mea amiotonu ua fai e le Atua ia te ia? Auā o le talitonuga o Iopu, e lē faia e le Atua se mea sesē faapea, i se tagata e mata’u ia te Ia. O le mafuaaga lea o lana fesili – O FEA E MAUAAI LE POTO MA LE MAFAUFAU?

O le manatu o Iopu, a maua le poto, ua iloa le uiga o puapuagā; a maua le mafaufau, ua iloa foi e le tagata, faauiga mea lelei ma mea leaga e tutupu i lona olaga. Auā o le faafitauli, a o mai faatasi mea lelei ma mea lē lelei, ona faapea lea, O mea lelei e mai le Atua, a o mea lē lelei, o le taui mai le Atua, ona o le leaga o le tagata. A e ua atagia i upu a Iopu, e leai ma se vaipanoa o le lalolagi lenei, e maua ai le poto ma le mafaufau. E leai foi se mea taugatā o i le lalolagi lenei, e mafai ona faatau mai ai le POTO ma le MAFAUFAU, e leai. A o fea la e maua ai le poto? O Iopu lava na tali – O le Atua.

Na o le Atua na te silafia le mea o i ai le POTO ma ona ala. A e faapefea ona maua e le tagata? “O le mata’u i le Atua, o le Poto lava lea; o le ‘alo ese i le amioleaga, o le mafaufau lea.” Afai la o le Poto ma le Mafaufau, e maua i le mata’u i le Atua, ma le ‘alo ese i mea leaga, o le a le fesootaiga o puapuaga & tiga, ma le poto & mafaufau? O le a le fesootaiga? O le Atua lava na molimau: O Iopu o le tagata Amiotonu/Mata’u/’Alo’alo ‘ese mai mea leaga, a o lea ua puapuagatia ma ma’i tigaina. E

faapefea la, ona fesootai le olaga amiotonu ma puapuaga? E faapefea ona tatou talia puapuaga ma tiga, i totonu o tatou olaga matata’u ma auauna faamaoni i le Atua? A e maise o le itu faigatā: e leai se tasi o i tatou e fia tigaina, pe fia faanoanoa, pe mana’o foi e oi ma pologa pea. Tatou te manana’o uma lava i se olaga fiafia, saoloto, filemu ma manuia. Ioe, o le mea lilo lea o loo fia faailoa mai. Auā, e leai lava se isi auala, e mafai ai ona tatou iloa lelei, le uiga o puapuaga ma mea tiga, e tutupu i o tatou olaga, vaganā ua tatou maua le poto moni mai le Atua.

O le upu moni: E lē mafai ona tatou maua le poto moni lena mai le Atua, vaganā ua tatou matata’u ia te Ia. E faapena foi, ona lē mafai ona tatou maua le mafaufau tonu, vaganā ua tatou ‘alo ‘ese mai mea leaga. Ioe, na o le Atua lava na te silafia o tatou olaga ma mea e tutupu ai; lelei pe leaga; fiafia pe faanoanoa, saoloto pe pologa, filemu pe tigaina.

“O le mata’u i le Atua, o le poto lava lea; o le ‘alo ‘ese i le amio leaga, o le mafaufau lea.” O lona uiga, O LE POTO & MAFAUFAU, O MEAALOFA TAUGATĀ MAILE ATUA, e maua fua e i latou o e matata’u ia te Ia.

Ua tatou faalogologo i le saunoaga a le Failautusi Aoao, susuga Vavatau Taufao FS, o le Faifeau foi lea o le Aulotu i Papauta, i talaaga o malumalu uma i lenei lauelele. O le ulua’i malumalu na fausia i le 1934. Na ato lau, e fa ona tala. O lona lua o malumalu, na fausia i le 1954. Na toe faatelē ma avea ma Hall pei ona i ai nei. O lona tolu o malumalu na fausia i le 1980. O le Sosaiete a Teine Papauta Tuai (TPT) i le taitaiga a le Taitaifono o Savali Sunia ma le Failautusi o Sina Tu’uu, sa nafa ma lea galuega, le malumalu lea na soso’o ma le maota tapua’i fou lenei.

Lea la ua tatou molimau i lenei malumalu matagofie. A e o tua atu, o le lāina ma timu’ia, o le sautia ma gapatia. O le uiga atoa lena, o le talitonuga o Iopu. O le upu moni, i totonu o tiga ma faigata, a o tau faufau lenei galuega, na i ai faatasi lava ma le POTO o le Atua, na faameaalofaina ai le au faatuatua, o e na tautiga ma ositaulaga mo lenei galuega. Ua a nei? Ua tatou vaaia atili, le pupula mai o le POTO o le Atua, e ala i lenei malumalu matagofie. Ua tū le failā. Ua atoa tino o le tama.

Lau tofa i le Matuaofaiva, Misa Tauiliili ma le Falefā o le Aiga Sālemalama – Faamalo le galalue, faafetai onosai, malo le faatoatoa. Ua e afu toto ma afu liligi, ona o le Atua ma Lana galuega. Le Ekalesia e, afai na faia lenei galuega ma le mata'u i le Atua, o lona uiga, e lē toe tau fesiligia le uiga o lou tigaina ma lou tautiga. Le poto lava lena, ua foa 'ifuaina mai e le Atua, ma faameaalofaina ai lou soifua auauna i lenei meaalofa taugatā.

O le faamalosi a le aposetolo o Paulo, “⁵⁸*O lenei, o 'u uso pele e, ia outou tumau, ma le lē faagaeetia, ia alualu lo outou faamalosi i le galuega a le Alii ma le lē aunoa, ina ua outou iloa e lē se mea faalēaogā lo outou tautigā i le Alii.*” *I Kori. 15.* Papauta, ua manaia tele lo outou malumalu. Ae ia manatua, “*O le mata'u i le Atua, o le poto lava lea.*” E amata i fea? O le tapuaiga i le Atua. O le mataupu e sili lena ona tāua. Ioe, O le malumalu lenei e te vivii ai i le Atua; e tatalo ai i le Atua, e faalogo ai i afioga paia a le Atua.

‘Aua le faia le malumalu nei ma nofoaga, e te faia ai fua tala o le isi ou uso; po o tala o le Tama’ita’i Pule ma Faia’oga, po o le Faifeau ma lona faletua ma le fanau, ‘aua! ‘Aua foi le faia le malumalu nei ma nofoaga e talanoa ai i isi pe fai ai feau tusitusia i telefoni (text). Ua mafi ai le toatele o tagata lotu i nei aso, e lauga mai le faifeau, a e felafoa’i solo text. Amuia outou, e ‘ea mālūlū la outou falesā. ‘Aua ne’i faasesēina ai outou; ne’i avea le mālū ma ala e se’e lelei ma gase ai le moe. E lē se fale moe, o le fale e tapua’i ai i le Atua.

Papauta, ia fai le Malumalu nei ma nofoaga, e te saili ai le POTO moni o le Atua. Ia faamanuia le Atua i le Tamaitai Pule, susuga i Faiaoga ma outou le fanau. Ia faamanuia foi le Atua i le tapuaiga mai a matua ma aiga. Faamanuia le Atua i lau afioga le Matuaofaiva ma le Falefā o le Aiga Sālemalama. Faamanuia le Atua i le paia o le Ekalesia Faapotopotoga Kerisiano Samoa, i Samoa nei ma atunu mamao. Ia alofa le Atua faatutumu lo outou ma’au, i faiga taulaga ua tino ai lenei galuega, ma le tele o feau faagasolo pea a le Ekalesia. Ia i le Atua Poto e toatasi le viiga ma le mamalu e faavavau. Amene.

(Saunia Taitaifono Fono Tele, Susuga Iosefa Atapana Uilelea FT, na ta’ita’i le Sauniga)

VAELUA LE MATAGALUEGA APIA SASA’E

O se tasi o Jugafono o le Fono Tele 2021, o le faamaonia lea o le Vaeluaina o le Matagaluega Apia Sasa’e, e pei ona sa fautuaina e le Komiti Au Toeaina. O le vaevaeina ua i ai nei:

(i) MATAGALUEGA VAIMAUGA - 2 Pulega.

(a) Pulega Vaimauga Sisifo:

EFKS Tanoalei’ā (Enefatu Lesa FT & Atigisami)

EFKS Vailele (Siaosi Salesulu FS & Sou)

EFKS Fagalii (Petaia Leavai FS & Tineiafi)

EFKS Vaivase-tai (Seilala Lumanuvae FS & Agape)

EFKS Moataa (Semikueva Faatoafe FS & Vesia)

EFKS Levili (Faalenuu Tagataese FS & Henrietta)

EFKS Vaiala (Iese Uele FS & Sia’eauli)

EFKS Maugafiafia (IonatanaTe’o FS & Vaitoa)

(e) Pulega Vaimauga Sasa’e:

EFKS Luatuanuu (Aila Patea FT/KMTA & Valasi)

EFKS Eva (Irenio Tagaloa FS & Lapu’ā)

EFKS Solosolo (Sepi Gafa FS & Meafou)

EFKS Leusoalii (Tanoalei’ā Tunupopo FS & Elalaumate)

EFKS Laulii (Pita Toleafoa FS & Emi)

EFKS Letogo (avanoa i le taimi o lenei lomiga)

(ii) MATAGALUEGA APIA SASA’E - 2 Pulega.

(a) Pulega Anoama’ā:

EFKS Manunu (Roma Enosa FT & Wilma)

EFKS Saoluafata (avanoa i le taimi o lenei lomiga)

EFKS Falevao (Tafa’i Galumalemana FS & Silupe)

EFKS Falefa (Tau Toleafoa FS & Leinati)

EFKS Lufilufi (Vaigalo Maua FS & Petimara)

EFKS Faleapuna (Peni Meaalofa FS & Faataualofa)

EFKS Lalomauga (Sakaio Maiava FS & Magalelei)

EFKS Fusi (Alo Pita FS & Milly)

(e) Pulega Fagaloa:

EFKS Uafato(Asotasi Time FT/KMTA & Savaliga)

EFKS Sauano (Ieti Tofaeono FS & Manu’ula)

EFKS Salimu & Musumusu (Harima LeMamea FS & Matuli)

EFKS Taelefaga (Tapuni Maulolo FS & Tinoi)

EFKS Maasina (Solomona Ta FS & Muamai)

EFKS Lona (Siaosi Samoa FS & Meli)

EFKS Samamea (Fililagi Toleafoa FS & Epenesa)

O le tausaga 1985, na ulua’i faavaeina ai le Matagaluega APIA SASA’E, ina ua vaelua le Matagaluega APIA ia Apia Sasa’e ma Apia Sisifo.

O A TATOU MEA E ‘AI E TATAU MA LE ASO

(*O mafaufauga faaleagaga mai le Tusi Faitau Aso ua faa-Samoaina*)

Aso Sa, 25 Iulai 2021

Agaalofa ae lē o le fasioti.

Aso Gafua, 26 Iulai 2021

Sili atu le lotogatasi nai lo le fe’ese’esea’i.

Tusi Faitau - Kenese 4: 1 – 16, “⁸Ua fai mai foi Kaino ia Apelu lona uso, ua i ai foi i la’ua i le fanua, ona tula’i atu lea o Kaino ia Apelu lona uso, ma fasioti ia te ia.”

O a tatou faitauga i nisi aso o muamua o le a aveina ai i tatou i totonu o nisi faitauga ‘pogisā’ o le Tusi o Kenese, na muamua faafeiloa’i ai i le Mata’isau o le Malamalama, le Atua Silisili ese! O le mataupu 2 o loo faamatala ai ma le matuā vāvālalata, le aumaia faatasi e le Atua o le tane ma le fafine e ala i le ‘aveina’, ‘faia’, ‘mānava le mānava ola’, ‘faamoegase’. O loo faamatalaina ai foi le fai pa’aga foafoa faatasi o le tagata ma le Atua i le faaigoaina ma le fausia o Etena – o se tulaga maualuga tele! Ona soso’o mai lea ma nei upu nutimomoia lona mata’utia faasino i le oti o Apelu i lima o lona uso o Kaino. E faapefea ona latou o mai, mai le tasi i le isi i ni nai sitepu pu’upu’u – mai le ola i Etena i le oti i le fanua?

Afai o le tala muamua i le Kenese e faasino i le manumāloina o le pogisā sa uftia ai le vai o le nunumi ma gaogao, o le tala lona lua ua faasino i le gaosā o loo fenumia’i i totonu o tatou ma manino ai le tulaga o le avea ma tagata. O le tala ia Atamu ma Eva, faapea Kaino ma Apelu, o loo ta’u mai ai o le mea lea ua tatou oo i ai i tatou, ma le tulaga o le a faailoa mo tatou. Mata e silafia lelei e le aposetolo o Paulo lenei mea i lona tusia, “²⁴Auē o a’u le tagata malaia!” *Roma 7*. O le tali a Kaino i le faafesili mai a le Atua po o fea lona uso, e faalēmīgao: ou te se leoleo mamoe i le leoleo mamoe? Peitai e lē o Kaino e faia le upu mulimuli, a o le Leoleo Mamoe lelei, le leoleo o i latou e vaivai ma taotaomia o latou leo. O le Atua o Ia le Atua. A e o le Atua foi o Ia le Tamā ma le Leoleo Mamoe i le tagata faatupu faalavelave ma le tagata sauāina – ua amata le tala o le alofa tunoa.

† Le Atua e, ou te tatalo ia e silasila alofa mai i faamoemoega ma le tigā o aiga uma, e aofia ai ma lo’u aiga. Auina ifo lou Agaga i luga o tala o lenei vaiaso, mo le manuia o tagata uma. Amene.

Tusi Faitau: Kenese 21: 8 – 21, “¹⁷Ua faafogaina foi e le Atua le leo o le tama; ona valaaau mai lea o le agelu a le Atua ia Akara mai le lagi, ua faapea mai ia te ia, ‘Akara e, ua faapefea ea oe? ‘Aua e te fefe, auā ua faafogaina e le Atua le leo o le tama i le mea o i ai o ia.’”

O lo’u tamā na fanau i le 1930’s, e lona tolu i le fanau a le tamā palagi ma le tina lanu. Na tutupu a’e ma tausia i latou i totonu o se faatoaga fualaau aina i Constantia Valley, sa ta’ita’i ai le tamā o lo’u tamā i le aufaigaluega a le isi palagi e ona le faato’aga. O le tutupu faatasi a’e ma le atalii o lē ana le faato’aga, na latou ta’ a’alo, tutuli, taufaalili, ti’eti’e pasika, taua’imisa ma talitaliē faatasi. Sa pei i latou o se au uso moni. Na suia atoa lena vaaiga a o latou faasolo ina talavou, i le tau toe manatunatu atu i ai o lo’u tamā, ina ua valaaau mai le faletua o le pule, ina ia alu atu o ia i lo latou fale. Sa faalagolago atu le tamaitai i le faitoto’ a i tua o lo latou fale ma faatonu atu, ia ‘aua ne’i toe valaaui lana tama i lona igoa o Ivana e pei ona latou masani ai, ae ia valaaau o ia o Ivana le Matai (Master Ivan). Ua i ai suiga!

I totonu o sosaiete o loo iloga ai le faa’ese’esege o kanera, vasega, tulaga ma ‘faafailelegatama’, o mea faapenei o ni vaaiga masani. E leai se manatu tiga e faaseā! Ae o le tulaga lena o loo i ai. Peitai e le’i faapea Akara. Na te lē fia taliaina. Ua uma ona ia faaigoa lana tama o Isamaeli, o lona uiga, ‘Ua faafogaina e le Atua’! Na ia si’itia i luga lona leo ma tagitu’i seja oo ina faafogaina e le Atua le tama! O loo taumafai le Tusi faitau e tau faamāmā le puapuagā sa feagai ma Akara ma Isamaeli, i le fa’ataata mai e tu’ua’iina foi Akara ona o lana amio i lo la’ua va ma Sarai. A o Aperaamo na taumafai i se auala e lavea’iina lenei faiga lē amiontonu, ae le’i gaua’i. Peitai le Atua na Ia faafogaina le teine pologa e tagi ma valaaau mo se amiontonu mo lana tama. O lana tama e lē o tautala i le tala, ae o lea ua ta’u mai na faafogaina foi e le Atua le tama! O le mea lea, e ala i ana taumafaiga, ua matale ai se ala fou o le alofa tunoa, ma faalautele ai foi le silafaga mamaao a le Atua mo le lalolagi.

†Le Alii e le Atua, e te faafogaina le tagi a i latou ua lē toe mafai ona fetagisi, po o latou loimata ua lē toe maligi ona ua latou masani i le lē lagonaina. Faafetai tele. Amene.

Aso Lua, 27 Iulai 2021. Faatuatua ma talitonuina

Tusi Faitau: Kenese 22: 1 – 19, “*Ua mavae ia mea, ona tofotofo lea o le Atua ia Aperaamo, ua faapea mai ia te ia, Aperaamo e; ona tali atu lea o ia, O a’u lenei. ²Ona fetalai mai lea o ia, Ia e ave lou atalii, o lou atalii e toatasī, o le ua pele ia te oe, o Isaako lava, ma e alu i le nuu o Moria; ma avatu ia te ia e fai ma taulaga mu i lea mea i le tasi mauga ou te ta’uina atu ai ia te oe.*”

O le nuu o Mukini sa matuā vevesi i lena taeao ina ua maua le tala e i ai se tamaloa o le a savali i luga a’e o le Afu i Vitoria i luga o se maea, mai le itu o Zambia agai i le isi itu o Zimbabwe! E le’i talitonu se isi e mafai e se tagata, ae sili ai, o le a taumafai se tagata, e savalia lea va e ta’ua o Mosi-oa-Tunya (‘O le asu e faitili’ lona ta’u e lauiloa ai) – o se taumafaiga e mata’utia le faavalevalea. Na va’ava’ai ma le ofo tagata o le nuu a o agai atu lea alii i luga o le maea. O se vaaiga ofoo fogia. ‘Tou te talitonu e mafai ona ou tosoa se tagata i luga o le uili paelo i le isi itu?’ na fesili atu ai le tamaloa. ‘E lē taitai! E leai!’ Ona tago lea o le tamaloa ua tuu ni maa e tusa lona mamafa ma se tagata i luga o le uili paelo, ma toso atu ai i le isi itu, a o maofa ma segia mauli o le nuu sa molimau. O se tasi alii talavou e igoa ia Takusaua, ua tuu ana feau masani sa fai ae sau e matamata i lenei mea ofoo fogia, ua pei ua ia vaaia se aitu a o ia tu ua meia ma ua leai se upu e mafai ona tautala ai. ‘E te talitonu nei la e mafai ona ou tosoa se tagata i luga o le uili paelo agai i le isi itu?’ ‘Ioe!’ o le valaau atu lea a Takusaua, ‘Ioe, ua ou talitonu!’ ‘Lelei’, o le tala lea a le tamaloa, ‘E mafai la ona avea oe ma le uluai tagata e toso!’ E pei o Aperaamo, o le a tofotofoina nei le faatuatua o Takusaua i le tamaloa. Sa faafuase’i ona ia manatua ana feau e tatau ona fai, ma le mea e oo ia te ia o loo faatali mai pe afai e lē faia. Ae, e faapefea ona ia lē talitonuina le mea ua ia faato’ā molimauina nei i ona lava mata?

† Le Alii e Iesu, o le faamamulu atu ma le tuu i le Atua e faigofie le faaupu nai lo le faataunu. Ou te talitonu i lou alofa; fesoasoani mai ia faaopoopo atili lo’u talitonu. Amene.

Aso Lulu, 28 Iulai 2021. Tatou te i ai uma i le tala a le Atua.

Tusi Faitau: Kenese 25:21 – 34, “²⁷*Ua tutupu nei tama; o Esau foi o le tagata ia ua poto i tuli manu, o le tagata a vao, a o Iakopo o le tagata agamalū o ia, ua mau i fale ie. ²⁸Na alofa Isaako ia Esau, auā ua ia ‘ai i ana manu; a o Repeka, na alofa o ia ia Iakopo.*”

O le tala ia Esau ma Iakopo o loo faamatala i se gagana e itiiti sona fiafia po o se agaga faafetai – e oo i le vavega na fanauina ai e Repeka se masaga! O le ‘vavega’ o loo tanumia i auiliiliga faa-faleaitu ae tele ina faanoanoa o le tala. Atonu o le auala lea ua avea ai o se tala e matuā faaletagata, ona e masani ona sili atu lo tatou maofa i taualumaga inosia, ma lē mafai ai ona iloa le vavega na te aumaia le aano o mea i luga. Ille avea ai o se tagatanuu Aferika i Saute, e masani ona faamanatu mai ia te a’u le vavega e iloga ai lo matou siitia mai le faailoga lanu i le vaitaimi o le 1990. O le polōketi o le fausia o malo ua faamaonia o se taumafaiga e sili ona faigata.

O Feseeseaiga, i ona fausaga ma foliga eseese, ua faamaonia le sili atu ona faigatā lona faataaviliga. E masani ona sa’o lenei tulaga i totonu foi o aiga, pe a avea le faaleleia o se fete’enaiga mafua mai i amio malolosi o tagata, e faaleaga ai le maopoopoga ia tasi o loo mana’omia, o loo talosia pea. O nisi taimi o a tatou tala e ofoina atu le mapusaga faa-mālie, e pei o le tala lenei i nisi vaega; ui i lea o le tele o taimi, e tu’ua i tatou o taofi le faanoanoa ma le ita, ma a’oa’oina e ola faatasi ma ia mea, o le ā lo latou tiga. Peitai o le Atua e lē sili lona alofa i le tasi nai lo le isi, ma e leai se tasi e soloiesea mai Lana fuafuaga, talu ai ona o filifiliga latou te fai. E faapena i Augātamā, e faapea foi mo i tatou.

†Le Alii le Atua e, na e faia le felanua’i ma eseesege. Fesoasoani mai ia ou taliaina ma opogi ma le fiafia i latou uma ua faamanuiaina ai a’u ou te faasoa atu i ai. Amene.

Mafaufauga Atili: O fea e mafai ai ona ou fesoasoani i faamaitega e oo atu ai i vaeluaga o eseesege ina ia faamalosia ai sootaga o tagata?

(fa’aaauau itulau 11)

MO LE FAAMOEMOE O LE TALA LELEI

(Lauga na atofa mo le Sulu Iuni 2021)

Tusi Faitau: Isaia 53: 1 – 8, 1 Korinito 9: 19 – 23
Matua: 1 Korinito 9, “²²Ua ou faapei o sē vaivai i e ua vaivai, ina ia ou maua e ua vaivai; ua avea a’u ma mea uma mo tagata uma, ina ia iu lava ina ola nisi ia te au.”

E lē i ai lava se lauga e pito sili ona lagona e le tagata mativa, nai lo le alu atu o le faifeau ma ulufale i le mea o loo ia nofo ai ma la talanoa, tusa lava pe gasu ma palapalā, ae a sese’e ai le faifeau, o se feau faagalogatā lena i le tagata vaivai. O le iloa o le tagata vaivai o loo i ai se tagata e amana’ia o ia, ma alofa moni ia te ia. E lē i ai lava se fofō po o se fualau faatupu fiafia i le tagata gasegase palapalā, nai lo le alu o le faifeau e milimili ona manu’ a ma faatalatalanoa.

O se tasi lea o metotia faafaifeau ua fa’aaogā e le apostolo o Paulo i lana galuega. O lona alu e militino faatasi ma tagata ia maua le lagona o loo lagona e le au vaivai. E aai faatasi ma talanoa faatasi, ola faatasi ma momoe faatasi. Tasi lea o manatu sa faigatā ona talia e tagata o le Pasefika i le taunu mai o le Tala Lelei. O nisi o Eklesia e fausia lava nofoaga faapitoa e faatasi ai o latou faifeau, toso ma le pa. E ese foi le mea o loo nonofo ai tagata. E tau lē lagona e tagata lolotu le mafanafana o se mafutaga ma latou faifeau. E i ai lava le tāua o lea faiga, pei ona i ai o tatou uso Katoliko.

Ae ona o tagata Pasefika e nonofo i nuu (communities or tribes), e faatāua aiga e nonofo faatasi i faiga nuu. O le ituiga faiga lena na vave ai ona salalau le LMS i laufanua o lo tatou atunu. E faigofie ona talia e tagata faifeau e nonofo faatasi ma tagata o le nuu, faifeau e manatu faatasi ma Paulo. ‘*Ua ou faapei o sē vaivai ina ia ou maua ē vaivai. Ua avea a’u ma mea uma mo tagata uma ina ia i’u lava ina ola nisi ia te a’u.*’ Na manatu tagata Iutaia, o lo latou Mesia folafolaina, e afio mai ma le pelu e faatoilalo uma malo o le lalolagi. O le a lē toe i ai se malo e toe mafafia Israel i le tulaga tau fitafita. E lē oo se tulaga inosia i lo latou Mesia, po o se uiga tigaina na tuulafoaiina e pei ona oo i le tatou Alii Faaola. A o le mea lava e faateia ai i valoaga ua faamauina i le perofeta a Isaia 53, “³*Ua inosia ma tuulafoaiina o ia e tagata; o le tagata faanoanoa, ua masani foi ma le tiga;*⁴*E moni, ua na tauave o tatou tiga, ma na tauave o tatou faanoanoa; a ua tatou manatu o ia ua taia, ua*

*fasia e le Atua, ma ua faatigaina.*⁵ *A ua manu’ a o ia ona o a tatou solitulafono, ua momomo o ia ona o a tatou amio leaga; o le aoaiga e filemu ai tatou sa i ona luga lea, o ona faalavalava foi ua malolo ai tatou.*” O le Atua ua afio ifo ma mau faatasi ma le tagata agasala. Sa ia lagona le mafatia o loo lagona e le tagata ua sāūaina. O le Mesia ua sauni e foai lona soifua atoa, ina ia soifua faatasi ma le tagata, o a lava a tatou lagona faaletagata, sa ia lagona foi e pei o tatou. “*Ua avea o ia ma mea uma mo tagata ina ia ola nisi ia te ia.*”

Sa avea o ia e pei o se pologa ina ia faaola o tatou tagata pologa i le agasala. Sa aai faatasi ma tagata agasala ina ia maua tagata agasala. E leitioa tausaafi le apostolo o Paulo i le uluai Eklesia i nuu ese. Ona o lea o ana auala e su’ e ai tagata, e faigofie ona talia e tagata. E ola faatasi ma tagata ma lagona le lagona o tagata. E lē faailogaina tagata ae tutusa tagata uma ia te ia. Na te iloa ona pulea lona mafaufa ma fetuutuunai ana mea e fai, ia tutusa ma le mana’ o o tagata. O le tagata ua sauni e faasatauro ona mana’ o, a o a mea sili ua ia manatu e faamanuia ai le faamoemoe o le Tala Lelei. O mea sa ia fiafia ai ma ola ai. A o le sini o lona faamoemoe, ia faaolaina agaga o e o loo latou faatasi ma folafola atu ai le Tala Lelei a Keriso.

Le fanau a le Atua, ia avea i tatou ma mea uma mo tagata uma, ina ia ola nisi ia i tatou – o le faamoemoe lena o le Tala Lelei. Faauō i tagata ma ia tatou taumafai e malamalamā i o latou faafitauli. Auā o lo tatou malamalamā i faafitauli, o le faigofie lena ona maua se vaifō faaleagaga mo latou. O le tiute o tatou Kerisiano, ia tatou auai i soo se faatasiga faalelotu, taaloga, galuega ma mafutaga i totonu o le nuu. O le faamoemoe maualuga ia avea lo tatou amio tausaafia ma taulamua i le fai mea lelei. E taaina ai nisi o tatou uso i le fai o mea sili mo le Alii. Ua uma ona avea Iesu ma mea uma mo tagata uma ina ia ola tagata uma ia te Ia. Sa soifua faatasi ma tagata agasala. O Lona faamoemoe ia maua le tagata agasala. A e le’i gata i ina, na oo i le tuugamau ina ia faaola foi i latou o i le tuugamau. O le faailoga lena, o a lava o tatou leaga ma vaivaiga o loo tatou toilalo ai faaleagaga, ua tanu i le tuugamau o Keriso. Auā afai ua toe soifua Iesu Keriso ma e ao foi ona tatou toe tutu mai faaleagaga ma avea ai i tatou ma tagata fou mo le Alii ma Lana Tala Lelei. Ia manuia ona o Iesu. Amene.

Saunia: Elisaia Fiu Kolia FS, EFKS Matautu-uta MATAGALUEGA APIA

Aso Tofi, 29 Iulai 2021

Fusi atoa e le Atua

Tusi Faitau: Kenese 27: 30 – 45, “³⁶Ona fai atu ai lea o ia, E lē o lea ea ua igoa ai o ia o Iakopo? Auā ua atu lua lona sisi’o mai ia te au, na ia fao le tofi o a’u le ulumatua, faauta foi, ua ia fao nei lo’u manuia.”

O le muagagana faa-Peretania ‘o pona ma ila uma’ o se valaaulia ina ia faamatala ma talia se tagata e tusa ma le tulaga tonu o i ai, aofia ai ma ona vaivaiga. E tupuga mai lea upu i le alii o Oliva Koromuela (Oliver Cromwell), sa avea ma le Alii Puipuia o le Malo Aufaatasi o Egelani, Sikotilani ma Aealani (Lord Protector of Commonwealth). E faapea le tala ina ua oo i le taimi e tusia ai lona ata e le alii tusiata o Pita Leli, sa faatonuina o ia e Oliva ina ia faailoa ona foliga faatasi ai ma ona ‘pona ma ila uma’. Tatou te lē mailoa ia te i latou na faamaopoopoina tala nei o i le Kenese faasino i ulua’i Augatamā, pe na ave i ai se faatonuga faapenei; a e o le mea mautinoa, latou te lē o taofia i tua se faamatalaga faasino ia Isaako, Esau ma Iakopo. E oo ia Repeka e lē o tuumāmāina foi!

O loo tatou ola i se tupulaga e tāua tele ai ata ma foliga, o lau tala e ao ona fausia ia fetau lelei ma le ituaiga maketi o tagata maimoa/faalogologo, ma o loo i ai nai ila ma pona ninii uma e mafai ona valivali ma aveesea faalegagana faatusa ae faapea foi i le uiga tonu o le upu! I se lalolagi o i ai tagata e (toe itiiti) mafai ona latou fuafuaina le ituaiga fausaga o pepe, o le tala lenei ia Esau ma Iakopo o se mānavaga o ‘ea fou. E pei o Mataio i lana gafa o Jesu o loo ta’ua ai fafine e toatolu e i ai o latou talaaga lē ‘mananaia’ (Mataio 1), e faapena foi iinei ua faailoa mai ai se laina o ulua’i augatamā e mamao mai le atoatoa, o loo ta’u mai ai le tala atoa o lo tatou tupuaga, le amataga o lo tatou faatuatuaga, ma le alofa tunoa na te lavea’iina.

Mafaufauga Atili: Siaki nei oe ma silasila ifo pe faafia ona e ‘alo ese mai ia i latou e lē matagofie, e lē matuā manaia ma matagā.

Aso Faraile, 30 Iulai 2021

O leo lē lagona o tamaitai

Tusi Faitau: Kenese 29: 15 – 31, “¹⁸Ua manao Iakopo ia Rasela, ua fai atu ia, Ou te auaua ia te oe i tausaga e fitu ona o Rasela lou afafine

aupito itiiti. ¹⁹Ona fai mai ai lea o Lapana, E lelei ona ou avatu ai o ia ia te oe, a e leaga ona ou avatu i se tasi tagata; ina ta nonofo ia ma a’u.”

E i ai la matou faiga masani i la matou Ekalesia, mo le tagata e faitauina le Tusi Paia, a mae’ a ona faapea lea, ‘O le upu a le Alii’ – a e tali atu i ai le faapotopotoga: ‘Le Atua e, faafetai’. Mata e tatau ona matou faapea atu, ‘O le galuega a le Alii!’ Auā e ui ina leaga faamatalaga auiliili o la tatou tala, a e o loo faamatala mai ai le Atua o loo galue. I le fa’aaogāina o i latou e mamao mai se amio lelei atoatoa, e ponaponā loloto olaga, ma e seāseā ona paia, o loo fausia ai e le Atua le nuu o le Atua. I le tala lenei, ua aga atu Iakopo i faigauō! Ua amata ona maopoopo lelei mai le gasologa o le olaga mo ia. O lagona o le alofa faiuō ma fuafuaga mo faaipoipoga ua fesoasoani ia te ia e faagalogalo ai mo sina taimi le mafuaaga na sola ese mai ai, e ui ina e lē o matuā manino mai lona lumana’i. Peita’i e lē mo se taimi umi! Ua fai e Lapana le togafiti ia te ia e paga tutusa ma lana foi faa’ole’ole i lona uso o Esau.

O se mea e faanoanoa tele ma aunoa se alofa ua faae’ e i luga o Iakopo – ae lē aofia ai le faiga e lenei tamā o ona afafine ma tamaitai pologa! Sa i ai le avanoa e mafai ai e Lapana ona faamatala le tū ma aga o faaipoipoga a lo latou afioaga ia Iakopo, a e na te le’i faia. O la tatou tala e peisea’i o loo ia fa’aatata mai, i le i’uga, e lē matuā faalētonu tele taumafaiga a Iakopo, ma e na te mauaina ni pulu pasama mo ona manu’anu’ a ma lona loto mafatia. Ina ia ‘maua’ atoatoa mea o loo fai e le Atua, e ao ona tatou nonofo pea ma o tatou tupu’aga faalētonu. E manaomia foi le tuu o i tatou ma le atoatoa i totonu o le tala e avea ma nuu o le Atua e ala i le malamalamā i o tatou lava faalētonu ma lo tatou manaomia o le alofa ma le agalelei o le Atua.

† Le Alii e Jesu, fesoasoani mai ia ou iloa o tagata ma mea o loo e silafia ma ou faia ai e pei ona e te faia. Amene.

Mo Mafufuga Atili: O i ai se lafitaga po o se fale saogalemū mo tina sauāina ma mafatia i ou tafatafa e mafai ona latou fa’aaogāina lau lagolago?

Tusi Faitau: Kenese 33: 1 – 17, “*Ona momo ‘e mai lea o Esau e faafetaia ‘i mai ia te ia, ua fusi ia te ia, ma punou i lona ua, ma feasogi ma ia; ona la fetagisi ai lea.*”

E masani ona ou maua i le tulaga lea, o ni faalavelave mata’utia e ono tula’i mai ma o le a matuā sauāina ai le mafaufau, e seāseā ona taunu. Pe afai e tuu lo tatou lē mautonu a e faafetaia ‘i mea o tatou fefefe i ai, ona iloa lea e lē matua’i leaga tele na’uā. Ua tele le malosi ma le taimi e alu i lo tatou sosola ese mai mea o tatou fefefe ai, ina ia ‘alofia le muagagana, ‘elefane i totonu o le potu’. I la tatou tala o lenei aso, o loo taumafai Iakopo e faafetaia ‘i lona fefe ia Esau. O loo taumafai foi e fesaga’i ma lana ia vaega na fai, i lenei mataupu faanoanoa ma le inosia. Ona ia sola lea ia saogalemū i le fa’āunu’ua ia Lapana, kolosi le Iapoka, o se vaega o le Ioritana ma le faitotoa i le Nuu Folafolaina, ma toe faasagatonu mea ua faalētonu, ina ia mautinoa le saogalemū o lona aiga pe afai e tula’i mai pēfea i le la’ua feiloaiga ma Esau.

O le saolotoga mai mea tiga o le tuana’i, e manuia uma ai le tagata aafia ma lē faatupu mafatiaga. Faato’ā mafai ona tatou saoloto uma faatasi. Peitai mo lena mea ia tupu, e ao ona taofi ma liliu lo tatou tamomo’e ese, i lo tatou tamomo’e mai o le tasi aga’i i le isi. O le a faate’ia i tatou i le ofo, auā o le tele o taimi tatou te iloa ai, ua leva ona sauni e le Atua le nofoaga mo la tatou feiloa’iga. E tatau ona iloa mea o tatou fefe ai ma lo tatou sao i ai, i le mafuaaga e talafeagai ai mo la tatou toe foi i tua e kolosi o tatou Iapoka. Ona tatou taunu foi lea o tatou, i le Nuu Folafolaina.

† Le Alii le Atua e, se’i e foai mai le malosi ma le lototele e faafilemū ai mea ou te fefe ai, ina ia moni lo’u saoloto atoatoa. Amene.

Mafaufauga Atili: O a mea o loo sili ona e fefe i ai, ae faapefēa ona faagata lou sola ese mai ai, ma amata lau malaga toe foi, ae maise lava i au faiga paaga?

O E UA FAI I LAGI

AMERIKA MALIGI

LAFAELE

4/5/1945 – 20/4/2021 (77+11+17)

O le tina ia Amerika o se tasi o tina matua o lenei ekalesiai Laulii. Na soifua mai i le Aso Lua, 4/5/1943 ae na valaauna e lona Matai i le Aso Lua, 20/04/21 ina ua 77 tausaga 11 masina ma 17 aso o lona soifua. O ona toe sauniga sa faia lava i le malumalu o le EFKS Laulii i le aso 4/5/2021 (o lona aso soifua) o lana aulotu na soifua ma tupu ae ai ma tautua ai le Atua i tausaga e tele o le soifua. Sa molimau le tamaitai ia Tuputasi, o le uii o le fanau, o lona alo teine foi lea e toatasi mai le fanau e toa sefulu ma le lua ma ta’ua ai o se tina galue malosi ma alofa i lana fanau ma lona aiga. O lana ‘ato lava sa lalaga ma faatau sa fa’ao’oga ai i latou ma tausi ai lo latou aiga. E savali lava i ia aso e leai ni ona seevae e ave ana galuega taulima e faatau mo lana fanau ma lona aiga. O lea lava foi le molimau a fanau mai atunu e mamao, e faaputuputu lava tupe mai ana galuega taulima mo a’oga a lana fanau. Sa molimau le Taitaifono o le mafutaga a Tina e fai ma sui o le mafutaga ma faailoa ai e maofa foi ona o ia le tasi o tina i le itupa o tamaitai, o fai ma vaaiga ona o galuega faatino aemaisse lava o tapenaga e asia ai le au matutua o lenei nuu. O le molimau faaleagaga na fa’auutū i le upu a Paulo, “*a ou vaivai ona ou malosi ai lea*”, auā e lē se tagata e matua malosi, ae lē faavaivai ai ae filigā lava i galuega uma e tautīgā ai. O a’u foi na ta’ita’i i ona toe sauniga na matou faamavae atu ai i lona tuugamau. Tofa Tina. Ia manuia lau malaga.

*Saunia Pita Toleafoa FS, EFKS Laulii
Matagaluega VAIMAUGA*

FAAFETE FAUSIA

SIKALETI

27/9/1936 – 16/2/2021 (84+4+21)

O le tina ia Faafete Fausia o se tasi o tina matua o lenei Ekalesia, na soifua mai i le Aso Sa, 27/09/1936 ae na valaaun le Atua ma faamanava feau i le Aso Lua, 16/02/2021 ina ua 84 tausaga, 4 masina ma le 21 aso o le soifua. O ona toe sauniga sa faia lava i le malumalu o le Ekalesia EFKS i Laulii, i le aso 23/

O E UA FAI I LAGI LE FOLAUGA

02/21, o le Ekalesia sa auauna ai i le Atua i tausaga e tele o le soifua. O au lava na taitai i le sauniga, ma faaulufaleina lona sa i le falesa, sa molimau le fanau i Samoa nei ma atunu u e mamao e fa'aaogā ai auala o fesootaiga faaonapo nei. O le molimau a le fanau a e maise le taule'ale'a ia Sefulu sa tausia lona tina, o se tina alofa ma finau mo le manuia o lana lava fanau, sa fai ma Faiaoga Aso Sa, fai ma tagata auai i le Aufaipese i aso o maua le malosi. O le Afioga i le Tiakono ia Tagaloa Peni na fai ma sui o le aiga o lana fanau a e o le Afioga foi i le Tiakono mai Solosolo ia Suitumu Sasa na fai ma sui o le aiga o le tina ia Faafete e molimauna ana galuega fai, ma ta'ua ai lona olaga o se tagata osi aiga. Sa molimauna lava foi lona soifua tautua i le mafutaga a tina e le faletua o le Susuga i le Aoao Fesoasoani ia Sina Tuautu, lona soifua faamaopoopo e ui foi ua afu le soifua ae sa galue lava foi e oo lava foi i le ekalesia e ala i lona matafale lotu.

O le molimau faale agaga na fa'aautū i le Tusi Faitau o lea aso, Salamo 92:12-15, i le manatu autū e faapea, "Onosai i lo tatou ola tuputupu ae." Auā e faapea lava le vaai a le Faisalamo i le laau o le pama, e tupu faasasa'o i luga ma faatusa i ai le tagata amiontonu, ae o lea laau faato'a fua mai lava ina ua matua lava ma tele ona tausaga. O le fesoasoani Katoliko Roma na saunia le faamafanafanaga mo fanau ona faai ai lea i lona oliolisaga tumau. O a'u lava na taitai i ona sauniga mulimuli i le tuugamau ma matou faatofa atu ai lea i le pese faatofa a le au-kerisiano. Manuia lau malaga tina.

*Saunia Pita Toleafoa FS, EFKS Laulii
Matagaluega VAIMAUGA.*

FAAFUALUA IUPATI TUUGA TAUANUU

22/2/1936 - 20/5/2021 (85+2+29)

O le alo o le faifeau o Iupati Tui Tuuga ma le Tina o Faasalusalu Iupati. Na fanau i le aiga o lona Tama i Vailoa Palauli, o iina foi e mafua ai lona igoa Faafualua. A'o lona soifua a'oa'oina ma lona olaga atoa, o Nu'uuli Amerika Samoa, i le aiga o lona Tina. Na faaipoipo atu ia Alalagafa Fauolo Tauanuu, mai Nua ma Seetaga Amerika Samoa. Na avea ma Tiakono Toeaina o le Matagaluega a Amerika i

tausaga e sefulumalelima. O i la'ua sa avea ma poutū malolosi o le aulotu EFKS AGAPE i Garden Grove, Kaledonia i Amerika.

Ma te taunuu mai i le galuega, ua maliu Fauolo, ae tauave to'atasi mai e Faafualua le matafale. O ia o le toe ulutaia o lenei aulotu, na auai i le faatuina ma lona amata mai. Auā o lo la'ua fale ma le maota, na amata mai ai, se'ia oo ina mautū ana mea totino. O le tausaga e 1963, na faavaeina ai le aulotu. Ua 58 tausaga le matua o le aulotu, o tausaga foi na, na galue mai ai Faafualua, se'ia oo lava ina faamanavaina e le Atua ana galuega. O lana miti, ia mautū meatotino, e faatino ai le tapuaiga.

Ua taunuu ia Faafualua upu masani a le atunuu, "E le tau faafuluina le toga lelei". Auā e fofola mai lava e aulelei ma matagofie. E faapena le soifua o lenei Tina. E aulelei lana amio, tausaafia ona uiga, e matagofie foi ana galuega ma mea e fai. O le matua o lona soifua, o le matua foi lena ma le malosi o ana faatinoga. E to'aga i le lotu, auā faatoa nofo lava i le fale, ina ua faateteleina le faama'i o le koviti, ma ua leai ni sauniga faitele i Aso Sa, ona o le vavao a le malo. E tausi faifeau, e alofa i le aufaigaluega ma le Ekalesia a Keriso. E lē masi'i sana tautala, ae a saunoa, e faalologo le aulotu e oo lava i le faifeau. auā e 'ānoa, ma le saunoaga e alofa. E lē iloa e Faafualua, se solomuli, pe faigatā ma mamafa, e alu ma le loto fiafia e faatino, auā ua masani ma le soifua tautua. O lana mau, o le tagata tautua, e inu malie foi i faamanuiaga mai le Atua.

O ona toe sauniga, na faia lea i le malumalu o le Atua, i le fanua maliu i Westminster. O se vaaiga faanoanoa ma le o'otia, a o se molimau foi lea i se taimi muamua o la'u galuega faa-faifeau, ua tao'oto ai ni pusa maliu se lua, i le taimi e tasi. O Faafualua ma si ona tuagane o Faleitu'au Asora Iupati, na fai faatasi o la toe sauniga.

Na ta'ita'i e le susuga i le toeaina o lenei Pulega, o ia foi o le Komiti o Mataupu tau le Aufaigalega a le Matagluega, o Makerusa Porotesano (FT). O talosaga, na saunia e le failautusi o le Matagaluega Leaoga Tanuvasa (FS). O le Tusi Paia na fofogaina e Pausa Thompson (FS), a o le upu faamafanafana, na saunoa i ai le alii faifeau o Time Laufili (FS). Na molimau le tamaita'i ulumatua o Sally Ahmu, e fai ma sui o le fanau. Molimau foi lona tuagane o Mati Itula Iupati, e fai ma sui o uso ma tuagane ma aiga. Na ou faia lona molimau faale-Agaga, ma ona toe

O E UA FAI I LAGI LE FOLAUGA

sauniga i luga o le tuugamau. O le fesili a le tupu o Aretasetia ia Neemia, ina o le a malaga e toe ati pa o Ierusalem, "Pe po fia ea lau malaga? E te foi mai afea?" O le tupu ua naunau i le auauna, e toe vave mai. O le auauna faatuatuaaina, e lē mana'o le tupu e alu umi, ae ia vave mai. E faapea lava ona tatou sa'afi ma momo'o, ina ia nonofo mai tagata faamoemoeina o le galuega. Peitai, e lē sili ane so tatou mana'o, pe a finagalo mai le Atua i lana tagata na fai. O le malaga e lē toe foi mai, auā ua silafia lava e le Atua, le aso ma le taimi, e malolo ai lana tagata. Faafetai tele galue Faafualua, Malo le onosa'i, malo le auauna. Mapu atu ia i aao o le Faavavau, ua valaau mai, Tautai a'e, ulufale mai i le fiafia o lou Alii. Ona matou faatofa lea i le Pese a le Eklesia, Talofa uso e, Tofaina oe. Ua sau le itupo e malolo. E ala oe pe a mavae le po. Tofa Faafualua.

*Saunia: Filo Tauaivale FS,
EFKS AGAPE, AMERIKA.*

FALEITU'AU ASORA TUUGA IUPATI.

4/4/1953 - 17/5/2021 (68+1+14)

O le tiakono o le aulotu EFKS AGAPE Garden Grove, Kaledonia Amerika, a'o se matafale malosi foi i totonu o le Eklesia. Na soifua mai i le aiga o lona Tama i Vailoa Palauli i le Aso Toonai, 4 Aperila 1953, ae faamanavaina ana galuega i le Aso Gafua, 17 Me 2021. E maliu Faleitu'au, e le i faia sona aiga. O ona matua, o le susuga i le Tama faifeau o Iupati Tuuga Tui o Vailoa Palauli, ma le faletua o Faasalusalu mai Nuuuli Amerika Samoa. Sa galulue o le faifeau tausinuu i le EFKS Fa'aala Palauli. E tusa ma faamaumauga, ua ova ma le tolusefulu tausaga o galue i le tofi tiakono. Sa avea foi ma Teutupe a le aulotu. O se auauna e faamaoni i ona tofiga. Auā e ui ina leai sona fesoasoani, ae lē mafai ona faatamala i le faataunuina o ona tofiga ma ona tiute faatiakono. O le teuteuina o le malumalu tapua'i, e faapea ma le saunia o le Laulau o le Talisuaga Pa'ia.

E leai se taimi na motusia ai lana auaunaga i le Eklesia, e oo lava ina faataotolia i lona gasegase, o galue lava. O aga ia ma uiga o le tagata e alofa i le galuega ma le Talalelei a Iesu Keriso. Ae ou te manatu foi, o le mautū lea o le faavae ma a'oa'oga na foafoa mai ai lona soifua, auā o ona matua, o auauna faamaoni a Keriso.

O Faleitu'au, o le tagata e lē fefe e tautala i le mea moni ma le amiotonu. E musu e soona fa'aalu seleni a le aulotu i mea e lē talafeagai i lana vaai. E naunau ina ia mautū ma lelei mea e tua i ai le galuega. E o faatasi lana upu ma le faatinoga.

E ui lava o le maualuga o lona suka, na mafua ai ona faamamā lona toto, ma avea ma gasegase tumau, ae e leai lava se manatu, o le vave lea o le a tu'ua ai le mafutaga, auā o le tagata malosi. Peita'i, e ese lava le vaai a le tagata, ese foi le silasila a le Atua na faia i tatou. O le itu e sili ona faigata ma lagona ai le mafatia, e uma lona soifua i le Aso Gafua 17 Me, ae to foi le mānava a si ona tuafafine matua o Faafualua Iupati Tauanuu i le Aso Tofi 20 Me 2021. Talofa e, e lē faigofie mo aiga ma fanau, ae maise foi o le aulotu.

Na faia faatasi o la'ua sauniga i le fanua maliu ma le malumalu i Westminster. Na ta'ita'i le Tama o le Pulega Makerusa Pototesano FT (KMTA). O talosaga na saunia e Leaoga Tanuvasa (FS), o le Tusi Paia na faitauina e Pausa Thompson (FS), a'o le upu faamafanafa, o le susuga Time Laufili (FS) faatasi ai ma le faaopoopo a le ta'ita'i. Na molimau le tele o fanau a ona uso ma ona tuafafine, i le sao tāua ma le aogā o Faleitu'au ia i latou. Na molimau foi Mati Itula Iupati, e fai ma sui o aiga ma ona uso ma tuafafine. Na ou faia lona molimau faale-agaga. Na 'au'au i upu a le fai-Salamo, *E silisili i le manatu o le Alii, le oti o ona tagata amio-Atua.* Ona ou faai'uina lea o ona toe sauniga i le tuugamau. Ma matou pepese ai i le Pese Faatofa a le Eklesia, Talofa uso e Tofaina oe.

Faafetai tele Faleitu'au mo lou sao tāua i aiga, ae maise foi o lau tautua i le Eklesia a Keriso. Mapu atu ia i aao o le Alofa Tunoa, o loo faatalitali mai, e avatu se faamanuia o lou tautigā.

E toe feiloa'i.

*Saunia: Filo Tauaivale FS
EFKS AGAPE, AMERIKA.*

SILINIU LILI'A ESAROMA

22/2/1970 - 4/4/2021 (51+1+14)

Na maliu Siliniu Lili'a Esaroma, le A'oa'o Fesoasoani EFKS Malaemalu, a o si'i ma'i lana faifeau i Niu Sila. O le aso 16 Aperila 2021 na fai ai ona Toe Sauniga i le malumalu o le EFKS Malaemalu, Falealili. Na taitai le susuga i le Toeaina o le Pulega Falealili, Tunumoso Iosia FT (Sui Taitafono Fono Tele), ma na saunia foi le Upu faamafanafana. O le susuga Amosa Vaetoe FS (Failautusi Pulega Falealili) na saunia Talosaga. Ma sa ou taumafai lava i se molimau faaleagaga mai Niu Sila i luga o le ZOOM. Na faavae la'u molimau i upu mai le Eperu 10:24, "Ia tatou manatunatu foi le tasi i le tasi, ina ia taufaatupu ai le alofa ma galuega lelei;"

Na faatiakono Lili'a ma le faletua ia Silia e le susuga Maauga Motu FS i le tausaga 2004, ae faamanuiaina i le tofi Aoao Fesoasoani i le 2015. Ma o le tagata foi e tele ona pulou sa pulou ai – o le a'oa'o, failautusi, komiti, faia'oga, matai, tamā, ave taxi ma le fai faatoaga. Sa Pule Lua i le Kolisi Itumalo Lefaga, faapea le Kolisi Faleata, faiaoga Kolisi Leifiifi, ma le Kolisi Falealili. Sa atagia foi i lona soifua galue lona fiafia tele e fai mea lelei, auā ua pei o se mea suamalie ia te ia le tautua, mo le feau ma le galuega a le Atua.

A fai se sailiga seleni a le Aulotu, Aoga Aso Sa, Autalavou, Aufaipese, o ia lava e ave i ai le faatuatuaga ma le faamoemoega a le matou Eklesia, na te faatinoina ia fuafuaga uma; ma e na te faia lava ma le faamaoni. E pei o le matou sailiga tupe i Ausetalia mo le galuega o le matou Hall. E faalua ona malaga Lili'a i Ausetalia, a e na totogi lava e ia lona pasese.

O le auauna e uiga tausaafia ma fai tala mālie. E fa'aaloalo tele o ia ia te a'u ma lo'u toalua. O le faamuamua lava ia a Lili'a, o le tausiga o lana faifeau ma lona toalua ma le aiga. O ia foi o se tagata e loloto le tofā. E fai tonu lelei. Na te iloa le taunuuga o soo se mea; auā o lana masani, e fuafua ma tapenapena mamao. E saunia lelei foi ana Lauga. A o lana lauga sili lava, o le ō gatasi o le ola faatuatua ma ana galuega fai. I le taimi na faato'ā faatau ai lana taavale la'u pasese, na fai mai a ia, 'O le taxi lenei e su'e ai tupe, e tausi ai la'u faifeau, ma tautua ai le Lotu. Ia sa faapena lava ona fai; e

faia'oga Lili'a i le taeao, ae a tu'ua le a'oga ona alu lea galue i le taxi. *A oo i pō o Aso Faraile taitasi, e fai ai Fono Tatalo a Faletua i Malaemalu, e pei o se mea fiafia lea ia Lili'a, lona faamālō ma faafeiloa'i i Faifeau ma Faletua.*

O se tagata sa faamāmā avega i soo se vaega o le feau ma le galuega a le Atua. E faamalosi'au ma faalototele ia te ma'ua, ae maise i si a matou Aulotu. E maliu nei Lili'a o avea ma Failautusi o le Aulotu. O le komiti o le Sene ma le Alofa; o le komiti foi o Taulaga. Sa filifilia foi ma Sui Usufono Tiakono, o le Matagaluega Falealili Sisifo, i le Komiti Atina'e, i le Fono Tele 2012 – 2015.

O le susuga i le A'oa'o ma lona faletua o Sesilia, e masani ona ave o la'ua aso livi (aso mālōlō) mai a la'ua galuega, a e ō mai ma le fanau laiti, e tauri le usugāfono i Malua i tausaga taitasi. A o le poto foi o Lili'a e oti! Ioe, e maliu tonu i le taeao pō o le Aso Sa Toetu (na fanau o ia i le Aso Sa, 22 Fepuari 1970). O le mafuaaga lea, e lē tatau ona fememea'i, pe atuatuvale i tatou le au Kerisiano. Aisea? Auā, manatua foi ua manumālō Iesu Keriso. Ua faaumatia ai le malosi o le oti.

Faafetai i le Atua mo Siliniu Lili'a. Ia 'aua lava nei ia te i matou, a ia faafoi atu pea le viiga i Lau afio. O ia lava o se meaalofo ma faamanuiaiga na foa'iina mai mo Silia ma le fanau ma le aiga, ae maise mo lana faifeau ma le Eklesia sa pele ia te ia. *Ia, Silia ma le fanau ua tu'ua - Tausala, Stephen, Emmily, Nicholas, Ramsi, Veve ma Carol – Ia i ai le filemu ma le mafanafana o le Alii, ma ia faamaise le Agaga o le Atua mo outou uma.*

A outou fetagisi, ua sala ina outou fetagisi.

A outou faanoanoa, ua tatau ona outou faanoanoa. Aisea?

Auā ua maliu le alii tele. "E! ua maliliu toa. Ua maumau ai auupega o le taua."

Ia manuia lau malaga Siliniu.

*Alofa'aga – Faaletaua Fa'aea FS,
EFKS Malaemalu*


MATAGALUEGA FALEALILI SAFATA SIUMU.

O E UA FAI I LAGI FOLAUGA

FAAFUALUA IUPATI T. TAUANUU.



SILINIU LILI'A ESAROMA



FALEITU'AU ASORA TUUGA IUPATI.

AMERIKA LAFAELE